

## Akinafarir Namba 2, Pol Timoti baghava an Osiri

### Akinafarir Faragha Zuim

Timoti, Pol ko ingangarir gumazim, egha Pol arazir aghuibar an akaghtima, a dar gin mangasa, kamaghin akinafarir akam Timoti bagha an osiri. Pol ghaze, Timoti uan nighnizir gavgavimın amırvaghan marki. Egh Kraıs İesusın akar aghuım akurır arazım ataghiraghan marki. Egh Godın akaba bar dar gin mangı. Eghtı gumazıba mızazıba ko osımtızıba a darıgham, eghtı a gavgavıgh ingangarır God a ganıngızım damuvıra ikıam.

Timoti gumazır nıghnızır aghuıba puvatızıba, me paza mıgeır akaba baraghan marki. Akar kamagh garıba gumazır orazıbar dabırabıbagh asıghası.

Timoti bar deragh Polın arazıbagh nıghnıghıva egh darara gin mangı. Arazır kabanang, pamtem nıghnızır gavgavım itır arazım, ko navır amırızım itım, ko bar ıgharaz darazıgh ifongezım, ko osımtızır avırıba aterım.

**Timoti, nı** guızın Godın ingangarır gumazımın ikısı, nı mıghı ingar

### (Sapta 1-4)

<sup>1</sup> Kı Pol, kı Kraıs İesusın aposel. God uabı uan ifongıamın gin ghua, aposelın ikıasa na mısefe. A fomıra akar dıkrızım gamua ghaze, e Kraıs İesus ko poroghıv ikıva, egh ikırımırır zurara itımın ikıam. God bızır kamın gun mıkmamın ingangarım na ganıngı. <sup>2</sup> Timoti, nı guızbangıra matı nan otarım, ezi kı akinafarır kam nı bagha an osiri. God en Afezıam ko en Ekıam Kraıs İesus,

aningin apangkuvim ko kuarkuvim ni damuti, ni navir amirizimin iki.

*Pol Timoti* migia ghaze, ni akar aghuim akunsi aghumsighan marki

<sup>3</sup> Nan ovaviba Godin ingangarim gamua uan araziba deravira da tuisigha arazir aghuibar gin zui. Ezi ki uaghan kamaghira Godin ingangarim gami. Egha ki arueba ko dimagaribar ki God ko migia zurara ni ginighnisi, egha God minabi. <sup>4</sup> Ki nin temeribagh nighnighavira ikia ua nin ganasa bar ifonge, egh kamaghin ki bar akuegham. <sup>5</sup> Ki kamaghin fo, ni guizbangira nighnizir gavgavim Kraisin iti. Ezi arazir kamra nin inaghamim, Lois ko nin amebam Yunis, aning nighnizir gavgavim iti. Ezi ki fo, ni uaghan nighnizir gavgavir kam iti. <sup>6</sup> Egha ki ua nighnizir kam ni ganidi, ni God ni ganingizir bizir aghuim damuti, a nin iki bar gavgafigh, mati gumazim avim givima, an mizariam bar ekefe. Ni fo, ki fomira uan dafarim isa nin dapanim gatizi, God gavgavim isa bizir aghuimin min ni ganingi. Ki datirighin gavgavir kam bagha ni migei. <sup>7</sup> Ni fo, Duar God e ganingizir kam, an e damuti e atiatingan kogham. Godin Duam gavgavim e ganidi, egha en akurvazima e igharaz darazigh ifonge. Egha e gamima, e uaghan deravira uan ikirimirimini gari.

<sup>8</sup> Kamaghin amizima, ni e uan Ekiamin akam akunsi aghumsighan kogham. Egh ni uaghan nan aghumsighan marki, ki an kalabuziar gumazim. Egh, ni Godin gavgavimin amodoghin na ko akar aghuim akunamin ingangarim bagh osimtizim iniam. <sup>9</sup> God en akuragha egha en diagha ghaze, e an gumamazibara. An en arazir aghuiba

---

1:3: Ap 22:3, 23:1, Ro 1:8-9, Fl 3:5, 1 Te 1:2, 3:10      1:5: Ap 16:1, 1 Ti 1:5, 4:6  
 1:6: 1 Te 5:19, 1 Ti 4:14      1:7: Lu 24:49, Ap 1:8, Ro 8:15      1:8: Ro 1:16, Fl 1:7, Kl 1:24, 1 Ti 2:6      1:9: Ro 8:28, Ef 1:4, 2:8-9, 1 Te 4:7, Ta 3:5, Hi 3:1, 1 Pi 1:20

bagha en diazir puvati. Fomira dughiar biziba tighar otivamimin, God uabi uan ifongiamin gin ghua en dia. Egha Krai Iesusin ingarimin a en apangkuvigha e gamizima e an gumaziba ko amizibar otifi. <sup>10</sup> Ezi datirighin Krai Iesus, a Gumazir ua en Akurvazim, a bar azenim girigha gifa. Ezi an ingangarimin, Godin apangkuvim uaghan en azenim giri. Krai Iesus, ovevemim gavgavim gasighasiki. Ezi an akar aghuimin tuavimin, a gumazamiziba bar me gamima me ikirimirir zurara itim gifo. <sup>11</sup> Ezi God kamaghin ifonge, ki akar aghuimin ingangarim damuasa. Kamaghin, an aposelin ingangarim, ko akam akurir ingangarim, ko gumazamizibar sure damuamin ingangarim bagha, a na misefe. <sup>12</sup> Ezi kamaghin amizima ki osimtizir kaba ateri, egha ki aghumsizir puvati. Ki, gumazir ki nighnizir gavgavim an itim, ki a gifogha gifa. Ezi ki fo, a ingangarir a nan dafarim gatizir kam a deraghviram an ganam, egh mamaghira iki mangiva dughiar Krai otoghamimin tugham. Bizir kam bagha ki aghumsizir puvati.

<sup>13</sup> Ni guizin akar ki ni ganingizir kabagh nighnighvira iki, egh ni arazir kamra gun mikimiva gumaziba ko amizibar sure damu. Egh Krai Iesus ko porogh ikiva, egh bar nighnizir gavgavim an ikivira ikiva, bar uan navim isi igharaz darazir aningiva me gifongegh. Arazir kamin, ni an gun me mikim. <sup>14</sup> Eghti akar aghuir God isa nin dafarim gatizim, ni bar deravira an gan. A bar bizir aghuim, kamaghin ni bar deragh an gan. Eghti Godin Duar en aven itim, a ingangarir kam bagh nin akuragham.

<sup>15</sup> Ni kamaghin fo, Esian Provinsin gumaziba bar na ategha gifa. Ezi Figelus ko Hermogenes uaghan na ataki.

---

1:10: 1 Ko 15:54-57, Kl 1:26, Hi 2:14, 1 Pi 1:20      1:11: 1 Ti 2:7      1:12: Ef 3:1-2, 1 Ti 6:20, 2 Ti 4:8, 1 Pi 4:19      1:13: 1 Ti 1:10, 4:6, 6:3, 2 Ti 2:2, 3:14, Ta 1:9, 2:1, Hi 10:23      1:14: Ro 8:11, 1 Ti 6:20

<sup>16</sup> Ki Ekiam ko migia ghaze, an Onesiforus ko an amuiroghboriba men apangkuvigham. A fo, Onesiforus dughiar aviriba nan navim gamima ki bar akonge. Egha ki kalabusin itima a nan aghumsizir puvati. <sup>17</sup> A Romin nguibar ekiamin ghughava, na buriagharuaviava, ghua bar gin na bato. <sup>18</sup> Ki God ko migia ghaze, Ekiam Godin Kotiamin Dughiamin an apangkuvigham. Ni fo, Onesiforus Efesusin nguibar ekiamin ikia nan akurvagha ingangarir aviribagh ami.

## 2

*Timoti bar deragh Krai Iesusin midorozir gumazimin iki*

<sup>1</sup> Nan otarim Timoti, ni zurara Krai Iesusin apangkuvimin amamangatightima a nin akuraghti ni bar gavgavigham. <sup>2</sup> Ni fo, ki fomira gumazir aviribar damazimin akar mabav kemezi, ni da baraki. Egh akar kabara ni da isiva gumazir deravira Godin ingangarim damuamibar aningigh. Eghti gumazir kaba, uaghan gumazir igharazibar sure damuamin fofozim ikiam.

<sup>3</sup> Ni, Krai Iesusin midorozir gumazir aghuir mamimin, ni e ko osimtizim ateram. <sup>4</sup> Ni midorozir gumazimin arazim a gifo. Gumazitam a midorozir ingangarim gami, a ingangarir igharazibagh amir puvati. Bar puvati. An garir gumazir ekiaba an ingangarim gifueghasa, a midorozir ingangarir aghuimram ami. <sup>5</sup> Kamaghira, gumazitam igharaz darazi ko ivemariva egh me gafiragh faragh otivsi, egh a ivemarimin arazibar gin mangiva, egh bizir aghuitam iniam. A ivemarimin arazibar gin mangan koghiva, a bizir aghuitam inighan kogham. <sup>6</sup> Eghti gumazitam puvira uan azenimin ingariva an opariva an

---

1:16: 2 Ti 4:16, 4:19    1:18: Ju 21    2:3: 1 Ti 1:18, 2 Ti 1:8, 4:5    2:4: 1 Ko 9:25    2:5: 1 Ko 9:25-26, 2 Ti 4:8    2:6: 1 Ko 9:7, 9:10

ganiva, egh a faragh gumazir mabagh itaghiva uan daghebar amam. <sup>7</sup> Ni akar ki mikemezir kabagh nighnigh, eghti Ekiam nin akuraghtima ni akar kabar mingariba bar dagh fogham.

<sup>8</sup> Egh ni zurara Kraiſ Ieſuſ ginighnigh. An aremegha ua dikafi, an Atrivim Devitin ovavimra. Ezi akar aghuir kamra, ki an gun migei. <sup>9</sup> Ezi akar aghuir kam bangin gumaziba nan gara ghaze, kar gumazir kuram. Egha me osimtiziba na garisi, egha na isa kalabus gati. Eghti Godin akam, a kalabusin ikeghan kogham. <sup>10</sup> Ki kamaghin ifonge, gumazamizir God ua bagha miseveziba, uaghan Kraiſ Ieſuſ ko poroghiv iki Godin Akurvazim iniva, ikirimirir aghuir zurara itim iniam. Kamaghin, ki gavgavim uan navim ganigava egha me bagha osimtizir kaba bar ada ateri. <sup>11</sup> Kar guizin akam, e nighnizir gavgavim an ikiam:

“E Kraiſ ko aremeghiva, egh a ko ikirimirir kamin ikiam.

<sup>12</sup> Egh e gavgavighvira ikiva osimtiziba bar a da ater, egh uaghan a ko atrivimin ikiam.

E akirim ragh a gasaraghti, a uaghan akirim ragh e gasaragham.

<sup>13</sup> Eghti e an gin angisi a ko akam akirigh,  
egh gin uan akar kamin gin mangan koghti,  
a uan akar an amizimin gin mangvira ikiam.

A uabi uan akam giragham kogham.

Bar puvati.”

*Timotin ingangarim God gamima a bar akonge*

---

2:8: Ro 1:3, 2:16, 1 Ko 15:1, 15:4, 15:20      2:9: Ap 9:16, 28:31, Ef 3:1, 3:13, Fl 1:7, 1:12-14, Kl 4:3, 4:18      2:10: 2 Ko 1:6, Ef 3:13, Kl 1:24      2:11: Ro 6:5, 6:8, 2 Ko 4:10-11, 1 Ti 1:15      2:12: Mt 10:33, Lu 12:9, Ro 8:17, 1 Pi 4:13      2:13: Nam 23:19, Ro 3:3-4, Ta 1:2

<sup>14</sup> Ni gumazamizibav kimvira ikitima me akar kam ginighnigh. Egh Godin damazimin mighivira me mikim suam, me pura akar muziariba bagh uari adoghadoghan marki. Arazir kam gumazitam akuraghan kogham. Egha a gumazir orazibagh asighasisi. <sup>15</sup> God nin ingangarim gan fueghsi, ni pamtem ingar. Ni ingangarir gumazir aghumsizir puvatizimin min ikiva, egh deravira guizin akam bighvirama a mikim. <sup>16</sup> Marazi mizer kinibav gia akar Godin nighnizimin gin zuir puvatizibav gei. Eghti ni akar kaba akirim ragh dagh asaragh. Ni fo, akar kaba gumazibagh amima me Godin saghon ghuavira ikia ghua bar an saghuiamin iti. <sup>17</sup> Gumazir kabanang uan akar kamin gumazibar sure gami. Ezi men akar kam, mati duam, a gumazimin namnam ikia an isiava anepava a gasighasisi. Men tongin ikia akar kabav geir gumazimning, Himeneus ko Filetus. <sup>18</sup> Aning guizin akamin tuavim ataki, egha kamaghin migei, “E aremegh ua dikavigha gifa, kamaghin e gin ua dikavighan kogham.” Ezi me akar kamin gumazamizir mabar nighnizir gavgaviba dagh asighasisi. <sup>19</sup> Ezi God mati gumazim dipenimin ingari moghin, a uan siosin ingarasa egha dipenir akinir gavgaviba akunizi da tugha ikia gavgafi. Egha dipenir akinir kabar a kamaghin osiri, “Ekiam bar uan gumazamizibagh fo.” Egha ua kamaghin osiri, “Gumazamizir Ekiamin ziam itiba, me bar arazir kuraba akirim ragh a dagh asaragh.”

<sup>20</sup> E fo, dipenir ekiamamin averiam, itarir maba iti, me silva ko golin a dar ingari, egha maba me tememin dar ingari, egha maba me nguazimin dar ingari. Maba, ingangarir aghuim bagha dar ingari, egha maba, me in-

---

2:14: 1 Ti 1:4, 5:21, 6:4, Ta 3:9      2:15: 1 Ti 4:6, Ta 2:7-8      2:16: 1 Ti 4:7, 6:20, Ta 1:14      2:17: 1 Ti 1:20      2:19: Nam 16:5, 16:26, Ais 52:11, Nah 1:7, Jo 10:14, 10:27, Ro 8:35, 1 Ko 8:3, 1 Jo 2:19      2:20: Ro 9:21, 1 Ko 3:12, 1 Ti 3:15

gangarir kiniba bagha dar ingari. <sup>21</sup> Kamaghin amizi, gumazitam uan arazir kuraba ateghiva, egh Godin damazim zuegham, a itarir me ingangarir aghuim bagha amizimin min otogham. A God baghavira itir gumazimin ikiam, egh guizbangira uan Ekiamin akurvaghham. Egh a ingangarir aghuir guar aviribar amusi ikiam.

<sup>22</sup> Kamaghin amizi, ni ifongiar kurar gumazir igiabar navibar otiviba ni akirim ragh dagh asaragh. Egh ni, arazir aghuiba, ko nighnizir gavgavim, ko igharazir darazir ifongezir arazim, ko navir amirizimin arazim, arazir kabanang ni bar pamtem dar suiragh dar gin mangi. Ni, gumazir Godin damazimin zueziba, me Ekiamin ziam fer gumazamiziba, ni me ko ikiva arazir kabar amu. <sup>23</sup> Marazi akar onganiba ko akar kiniba gamua uari adoghadosi. Ezi ni akar kabanang akirim ragh dagh asaragh. Ni fo, akar kaba da gumazibagh amima me akaba uari adosi. <sup>24</sup> Godin ingangarir gumazim igharaz darasi ko uari adoghan kogham. Puvati, a bar men asughasugh devira me damuam. Egh men tisan aghuimin ikiam. Eghti me an akaba batoghti, an aghumra ikiam. <sup>25</sup> Egh a gumazir akaba batoziba men asughasugh me akirvaghsi mangvira ikiam. Egh a kamaghin damuti, God men akuraghti me ti uan navibagh iraghiva, egh guizin akam gifogham. <sup>26</sup> Satan fomira me gifara me gamizi me an azuazimin aven ikia egha an ifongiamin gin zui. Egh me guizin akam gifogh, men nighnizir aghuariba uamategham, egh Satanin azuazim ategh ua firighregham.

### 3

#### *Dughiar Abuananaba, gumaziba arazir kurabar amuam*

---

2:21: 2 Ti 3:17, Ta 3:1      2:22: Ap 9:14, 1 Ko 1:2, 1 Ti 1:5, 6:11      2:23: 1 Ti 4:7, 2 Ti 2:16, Ta 3:9      2:24: 1 Ti 3:2-3, Ta 1:7-9, 3:2      2:25: Ga 6:1, 1 Ti 2:4, 6:11, Ta 1:1, 1 Pi 3:15

<sup>1</sup> Ezi ni bizir kam gifogh, Dughiar Abuananaba, os-  
 imtizir bar kuraba otivam. <sup>2</sup> Gumaziba vaghvagh uari  
 baghivira nighnigham, egh me dagiaba baghiva bar  
 kuvigham. Egh me uari uan ziaba fiva, egh igharaz  
 darazir gan suam me pura biziba, egh igharaz darazir  
 ziaba gasighasighiva, egh me uan ameboghfeziabar akaba  
 baraghan kogham. Egh gumazamizir arazir aghuibar  
 me gamiba, me me minabaghan kogham. Me Godin  
 aghuagham. <sup>3</sup> Egh me namakabagh ifongezir arazim  
 gifogham kogham. Egh igharaz darasi ko uarir atariva,  
 egh me adariba givan tuaviba puvatigham. Me akar  
 kurabav kimiva igharaz darazi girakirangin me mikimam.  
 Egh me uan navir ghurimin araziba dikabiniva avegham,  
 egh pura gumazibav soghiva me gasighasigham. Egh me  
 arazir aghuibar apanimin ikiam. <sup>4</sup> Egh me uan namakaba  
 paz me damuam. Egh me deraghvira nighnighan kogh,  
 egh atamra uan nighnizir kurabar gin mangam. Egh me  
 uarira uarigh nighnigh suam, erara gumazir ekiaba, e bar  
 pin iti. Egh me uan nivafizir agorogebar gin mangisi, egh  
 God gifueghan kogham. <sup>5</sup> Egh me pura ifar mikim suam,  
 me Godin gin zui. Egha guizbangira me Godin gavgavim  
 akirim ragha a gasara. Ni gumazir kamaghin amibar  
 saghon iki. <sup>6</sup> Ezi men marazi tuaviba buria dipenibar aven  
 ghua amizir nighnizir aghuiba puvatizibar me apezepera,  
 egh kalabuziabar min me gamima me men apengan iti.  
 Amizir onganir kaba me arazir kurar avirim gami, egha  
 dar osimtiziba me taragha uaghiri. Ezi men naviba me  
 gaghavkirima me arazir kurar mingariba puvatizibar  
 amuasa ifonge. <sup>7</sup> Egha amizir kaba me sure damuasa bar

---

3:1: 1 Ti 4:1, 2 Ti 4:3, 2 Pi 3:3, 1 Jo 2:18      3:2: Ro 1:29-31, 1 Ti 1:20, 6:4, 2 Pi  
 2:3, 2:12      3:3: Ta 2:3, 2 Pi 3:3      3:4: Fl 3:19, 2 Pi 2:13, Ju 4, 19      3:5: Mt  
 7:15, 7:21, Ro 2:19-20, 2 Te 3:6, 1 Ti 5:8, 6:5, Ta 1:16      3:6: Mt 23:14, Ta 1:11



ifonge, egha me guizin akam gifoghan kogham. <sup>8</sup> Fomira Janes ko Jambres aning Mosesin apanimin iti moghin, gumazir kaba guizin akamin apanim gami. Ezi men nigh-niziba deragha ingarir puvatizima me nighnizir gavgavim Godin itir puvati.\* <sup>9</sup> Eghti men arazir kam bar ekevegham kogham. Gumaziba bar men arazir kabar ganigh fogh suam, da bar ikuvigha ongani, mati gumaziba fomira Janes ko Jambres aningin arazibar gara ghaze, da bar ikuvigha ongani.

*Timoti mighivira* Godin akamin suiragh

<sup>10</sup> Ezi ni na ko ikiava, egha nan arazir ki manmaghin gumazamizibar sure gamim, ni a gifo. Ni nan dabirabir arazim ni a gifo, egha uaghan nan arazibar mingarim sara. Ni fo, ki nighnizir gavgavim Godin iti, egha zurara uan navim gavgavim a ganiga ingangarim gami. Egha ki igharaz darazigh ifuegha, egha tugh a gavgavigha osimtiziba ateri. <sup>11</sup> Ni arazir kurar gumazamiziba na gamiziba, ni dagh fo, egha uaghan mizazir ki Antiok ko Aikoniam ko Listran ikia iniziba sara. Ezi ni fo, me nguibar ekar kabar arazir bar kurabar na gami. Ezi Ekiam osimtizir kabar aven nan akurazima ki deravira iti. <sup>12</sup> Bar guizbangira, gumazir Kraiss Iesus ko iki Godin arazibar gin mangasa ifongeziba, me bar, gumaziba pazi me damuam. <sup>13</sup> Eghti gumazir kuraba ko ifavarir gumaziba, gumazamizibagh ifar mangvira iki. Eghti Satan uaghan me gifaram, eghti men araziba bar kuvigham.

---

3:8: Kis 7:11, Ro 1:28, 2 Ko 13:5, 1 Ti 6:5, 2 Ti 2:25 \* 3:8: (3:8) Judaba kamaghin eghara ghaze, Janes ko Jambres, kar Mosesin dughiamin ikezir Isipin Atrivimin ganganir gumazimningin ziamning. Ni Kisim Bek 7:22 ko 9:11in gan. 3:10: Fl 2:22, 1 Ti 4:6 3:11: Sng 34:19, Ap 13:14-52, 14:1-20, 2 Ko 1:10 3:12: Mt 16:24, Jo 15:20, 17:14, Ap 14:22, 1 Te 3:3 3:13: 2 Te 2:11, 1 Ti 4:1, 2 Ti 2:16

<sup>14</sup> Ezi nirara, ni mighivira guizin akar kamin suiragh, akar ni a inigha nighnizir gavgavim an itim. Guizbangira, ni bar deravira e gifo, e gumazamizir akar kamin nin sure gamiziba. <sup>15</sup> Egha ni fo, dughiar ni aghirimira itim, ni faragha Godin Akinafaribar fofozim ini. Akinafarir kaba da nighnizir aghuiba ni ganidima, ni nighnizir gavgavim Kraiss Iesusin ikiva, ni Godin Akurvazim iniam. <sup>16</sup> E fo, Godin Duam uabi, Godin Akinafarimin aven itir akaba dagh amizi da otifi. Ezi akar kam a bar bizir aghuim, a guizin akamin en sure gamuava, egha gumazamizir nighniziba derazir puvatizibar akirava, egha en daroriba akirava, egha arazir Godin damazimin derazibar en sure gami. <sup>17</sup> Kamaghin, akar kaba e Godin gumazamiziba, da e gamima e arazir aghuiba bar da inigha ingangarir aghuibar amuasava ami.

#### 4

##### *Timoti Godin akam akunsi bar gavgafigh*

<sup>1</sup> Kraiss Iesus uamategh izi atrivimin ikiamin dughiam, a en araziba kotiamin da tuisigham, gumaziba ko amizir ikiavira itiba ko ariaghreziba uakan. Kamaghin ki Godin damazim ko Kraiss Iesusin damazimin mighighavira kamaghin ni migia ghaze, <sup>2</sup> ni Godin akam akunsi bar gavgafigh. Gumaziba akam baraghasa ifonge, o a baraghan aghua, ni zurara Kraissin akam akunsi pamtem ingar. Egh ni men navibagh inivsi akar gavgavibar me mikim, egh me uan arazir kuraba akirsi me mikimiva, egh me Godin arazibar gin mangisi me mikim. Egh ni asughvira me damuva egh deravira God ifongezir arazibar men sure

---

3:14: 1 Ti 1:13, 1 Ti 2:2      3:15: Jo 5:39, 1 Pi 1:20-21      3:16: Ro 15:4, 2 Ti 2:21, 2 Pi 1:20-21      3:17: 1 Ti 6:11, 2 Ti 2:21      4:1: Ap 10:42, Ro 14:9-10, 1 Ti 5:21, 6:13      4:2: Ap 20:20, 20:31, 1 Ti 4:13, 5:20, Ta 1:13, 2:15

damu. <sup>3</sup> E fo, dughiam izitima, gumazamiziba ua guizin akam baraghsi ifueghan kogham. Men kuariba akar igharaziba baraghsi bar ikuvigham. Egh me uari bagh tisan aviriba inighti, me akar me oraghasa ifongezibar men sure damuam. <sup>4</sup> Kamaghin me guizin akam akirim ragh a gasaragham. Egh me pura eghaghanir kinir igharaziba baragham. <sup>5</sup> Eghti ni uabi, ni zurara deravira nighnigh ikiva osimtiziba ko mizaziba ater. Egh akar aghuim akurir ingangarim damu. God gumaziba ko amizibar akurvaghamin ingangarim ni ganingi. Kamaghin ni ingangarir kam deraviram a damu.

*Pol ovengamin dughiam roghira ize*

<sup>6</sup> Ezi ki uabi, nan ovevem in dughiam roghira ize. Eghti nan ghuzim mati wainin dipar me God ganidimin min, abuan irasava ami. Nan dughiar ki mangamim a roghira izegha gifa. <sup>7</sup> Ki pamtem ingara akar aghuim deraviram anakuri, mati ivemarir gumazim pamtem ivemari. Egha ingangarir God na ganingizim ki anegifa, mati ivemarir gumazim uan ivemarim anegifa. Egha ki nighnizir gav-gavir Godin itim, ki pamtem an suiragha mamaghira iti. <sup>8</sup> Ezima ivezir aghuim a na mizuai iti, mati ivemarir gumazim an ivezir aghuim a mizuai. Ezi ivezir aghuir kam a kamakin, God na mikim suam, ni nan damazimin dera. Ekiam arazir aghuimra gin mangiva gumaziba ko amiziba kotiamin aven men araziba tuisigham. Egh Dughiar Krais Otoghamin, a ivezir aghuir kam na daningam. Egh a narara daningan kogham. Puvati. A ivezir aghuir kam isi, gumazamizir a mizua a uamategh izamin dughiam gifongeziba, a bar me daningam.

---

4:3: 1 Ti 1:10, 4:1, 2 Ti 1:13, 3:1, 3:6      4:4: 1 Ti 1:4, 4:7, Ta 1:14      4:5: Ap 21:8, Ef 4:11, 2 Ti 1:8, 2:3      4:6: Fl 1:23, 2:17, 2 Pi 1:14      4:7: 1 Ko 9:24-25, Fl 3:14, 1 Ti 6:12, Hi 12:1      4:8: 1 Ko 9:24-25, 2 Ti 1:12, Je 1:12, 1 Pi 5:4, MAA 2:10

*Timoti zuamira Pol bagh izi*

<sup>9</sup> Ni damu, zuamira na bagh izi. <sup>10</sup> Ni oragh! Demas, a nguazir kamin biziba bagha bar ifuegha, kamaghin a na ategha gifa, egha a Tesalonikan nguibamin ghu. Ezi Kresens Galesian Provinsin ghu, ezi Taitus Dalmesian Distrighin ghu. <sup>11</sup> Luk uabira na ko iti. Kamaghin amizima ni Mak batoghiva a inighiva a ko izi. A gumazir aghuir ingangaribar nan akurvazim. <sup>12</sup> Ni fo, ki Tikikus amadazima an Efesesin nguibamin ghu. <sup>13</sup> Ni izisi, nan azenan azuir korotiar ruarim inigh izi. Ki Troasin nguibamin ikia Karpusin dipenimin anetaki. Egh akinafarir righiziba sara inigh. Bar bizir ekiam, ni akinafarir me asizir inibar ingariziba da inigh izi.

<sup>14</sup> Aleksander, gumazir ainin bizibar ingarim, a bar paza na gami. Ekiam gin an arazir kurar an amizir kam ikaragham. <sup>15</sup> Eghti ni uaghan gumazir kam bagh gan. A bar guizbangira en akabar apanim gami.

<sup>16</sup> Ki faragha Kotin tughha akaba ikarvazima gumazitam na ko tughha nan akamin akurazir puvati. Gumaziba bar na ataki. Ki God ko mikimtima, a men arazir kurar kam ginighnighan kogham. <sup>17</sup> Ezi Ekiam uabi nan boroghin ikia gavgavim na ganidi. Kamaghin amizima ki akar aghuim bar anekurima, Kantrin Igharazibar Gumaziba, me bar a barasi. Ezi ki ovengasava amima God nan akura, mati a laionin akamin ua na ini. <sup>18</sup> Ezi Ekiam me na damuamin arazir kuraba, a nan akuragham. Egh a deravira na damuva nan aku uan Nguibar a ikiava

---

4:9: 2 Ti 1:4    4:10: 2 Ko 8:23, Ga 2:3, Kl 4:14, Fm 24, Ta 1:4, 1 Jo 2:15    4:11: Ap 12:12, 12:25, 13:13, 15:37-39, Kl 4:10, 4:14, Fm 24    4:12: Ap 20:4, Ef 6:21-22, Kl 4:7-8    4:13: Ap 20:6    4:14: Sng 28:4, 62:12, Snd 24:12, Ap 19:33, Ro 2:6, 1 Ti 1:20, MAA 18:6    4:16: Ap 7:60, 2 Ti 1:15    4:17: Sng 22:21, Dan 6:22, Ap 23:11, 27:23, 2 Pi 2:9    4:18: Sng 121:7, Ro 11:36, Ga 1:5, Hi 13:21

atrivimin itimin mangam. Eghti e an ziam fi mamaghira ikiam. Bar guizbangira.

<sup>19</sup> Ni nan akam isi, Prisila ko Akwila, ko Onesiforusin amuiroghboribar aning suam, Afeziam ia ko iki. <sup>20</sup> Erastus Korinin nguibamin ikiavira iti. Ezi Trofimus areima ki anetaghizima a Miletusin nguibamin iti. <sup>21</sup> Ni damu, zuamira na bagh izi. Ni suighsuightima, amozim ko aminir orangtizimin dughiam otogham.

Yubulus ko Pudens ko Linus ko Klodia ko Romin nguibamin itir Kraisin adarasi, me akam amaga ghaze, Afeziam ni ko iki.

<sup>22</sup> Ekiam nin duam ko iki. Egh an apangkuvim bar moghira ia ko iki.

Godin Akar Aghuim; Akar Dikirizir Gavgavir Igiam  
The New Testament in the Aruamu language of Madang Province,  
Papua New Guinea, 2004 Edition  
Nupela Testamen long tokples Aruamu long Madang Provins long  
Niugini long 2004

copyright © 2004 Pioneer Bible Translators and the Bible Society of Papua New Guinea

© Faith Comes by Hearing

Language: Aruamu

Translation by: Pioneer Bible Translators

### Godin Akar Aghuim in the Aruamu Language

This translation was produced by Pioneer Bible Translators, and was published in 2004 by the Bible Society of Papua New Guinea.

If you are interested in obtaining a printed copy, please contact the Pioneer Bible Translators at [www.pioneerbible.org](http://www.pioneerbible.org)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-03-04

---

PDF generated using Haiola and XeLaTeX on 5 Mar 2021 from source files dated 29 Dec 2019

8f6beb37-6783-55d5-91ed-8321cc3f5eea